

ՄԱՅԱԹՆՈՎԸ / Հայ ժողովրդական հեքիաթներ, Հատոր VIII / Գուգարք (Լոռի), Լոռու բարբառ (խոսվածք)

Մի թաքավոր ա ըլըմ, դա ունենըմ ա մի կնիկ, մի տղա, մին էլ մի սիրուն աղջիկ: Դրանք սովորութիւն են ունենըմ, ամեն տարի գնըմ են Քրիստոսի հմար մատաղ անըմ (նրա գերեզմանին մեռնիւմ, էրեսս նրա ոտի տակը...):

Հմի էլ ախչիկը հասնըմ ա, հմա հասած ախչկանը հետներուն տանիլն աղաթ չի ըլում: Ում պահ տան, ում չի պահ տան, բերըմ են իրենց քաղաքի դրաուլնու վենձին պահ տալի, թամբահ անըմ, ասըմ.— Ամեն օր հացն էլ, խորակն էլ կտանես ակոշկի ծակովն իրան կտաս, եղ կդառնաս:

Ախչկանն էլ ասըմ են.— Միչի կոնից դուռը դայիւմ կփագես, գանք տենանք դռան տակին մի թգաբոյ կանանչ ա դուս էկել:

Տեւ ասըմ են ու իրանք մի ամսով՝ հեր ու տղա, մին էլ մերներուն գնըմ են:

Էն դրաուլաշին էլ ամեն օր բերում ա հաց ու ջուրը ակոշկի նեղ ըրանքովը տալի եղ աղջկանը, եղ դառնըմ:

Մի օր էլ, որ հացը բերըմ ա տալի, աչքովն ա ընգնըմ աղջկա շարմաղ ձեռը, խելքը գնըմ ա, ասըմ ա.— Որ ձեռն էսքան սիրուն ա ու շարմաղ, բա ի՞նքն ինչքան կլի սիրուն:

Մի օր, էրկու օր, դա մտկափոխվում ա, ասըմ ա.— Թեկուզ աշխարհն էլ գըլխիս փուլ գա, ես սրա գլուխն իմ գլխի հետ մին տեւ անիլ:

Ի՞նչ անե, ի՞նչ չանե, գնըմ ա մի ջադու պառավ ա գոնըմ, մի բոլ փող ա տալի ասըմ ա.— Էս գործը գլուխ տիս բերիլ:

Ասըմ ա.— Աչքիս վրա:

Ջադուն գալիս ա էղ ախչկա դուռն թխկացնըմ ա.— Դուռը բաց արա, ազիզ ջան, քո մոքիրը քոռանա, հագարենցը մի անգամ էկել եմ, էն էլ քիրս ու փեսես գնացել են մատաղի, բաց արա քեզ էլա տենամ:

Նաչար ախչիկը հվատըմ ա: Մին ուզըմ չի բաց անե, հմա եղ ասըմ ա.— Մոքրիս հմար ի՞նչ տին ասիլ, հազիր մենակ չեմ մնալ, ինձ կպահե:

Կանանչը նոր ավլուկի պես արած ա ըլըմ դռան տակին, զարթելով դուռը բաց ա անըմ:

Ջադուն նի ա մտնըմ, մթամ թե դրա մոքիրն ա, փթաթվըմ ա, պչպաչորվըմ ա, էղ նաչարն էլ ճնանչըմ չի:

Եղնա ասըմ ա.— Գնամ քի հմար բան ու ման առնիմ՝ բերեմ:

Դուս ա գալիս, գնըմ ա դարաուլաշուն ասըմ ա.— Սհե, սհե. հմի ո՞նց անենք:

Ասըմ ա.— Ես բաղնիսն ուրիշ մարթ չեմ թողալ, դու նրան բի բաղնիս, դու հեռացի:

Եղնա կամ փետ ա առնըմ, ուտելու լավ-լավ բաներ ա առնըմ, հետը դրգըմ:

Ջադուքար պառավը բերըմ ա կամփետ տալիս, բերածնին ըստովի վրեն լքցնըմ, ինքն էլ հետն ուտըմ են, եղնա ասըմ ա.— Քոռանա քո մոքիրը, ով գիդե ինչքան վախտ ա ջրի էրես չես տեհել, արի, արի գնանք բաղնիս, քի լողացնեմ:

Ասըմ ա.— Չէ, մոքիր ջան, իմ հերն ասել ա տանից դուս չի գաս, ես կարալ չեմ:

Ասըմ ա.— Ծուռ ա արել, նա որ գիտենար ես գալ տեւ, ինձ պահ կտեր, բա հըմի որ ես էկել եմ, էլ ընչից ես վախըմ: Գնանք բալա ջան, գնանք:

Շատ որ տեղը նեղըմ ա, իլլաջը կտրըմ ա, վեր ա կենըմ, գնըմ:

Հասնըմ են բաղնիսի դուռը թե չէ, էղ քյավթառը դրան նի յա բոթըմ ու ինքը եղ դառնըմ:

Ախչիկը հլէ մին էլ տենըմ ա դրաուլբաշին ըղաքին կաղնեց, դուռը փագեց ու բլանիքը դրուց ջեբըմը:

Դա ծվըմ ա, ճչըմ ա, հմա էլ նոր ի՞նչ կարա անե:

Ասըմ ա.— Գլուդ գլխիս հետ մին տեմ անիլ:

Ախչիկը տենըմ ա, որ էլ կարալ չի բան անել, ասըմ ա.— Լավ, հմա առաջ պտինք լեղանալ, եղնա:

Դրաուլբաշին իրան մտկըմն ուրախանըմ ա, ասըմ ա.— Լավ կլի, արի ես քեզ լեղացնեմ:

Ասըմ ա.— Չէ, առաջ ես քեզ լեղացնեմ:

Նրան տկոթիլ ա տալի, սապոնը քսըմ ա գլխին, փրփուրը կլիտըմ ա, աչքերն ա լցնըմ, մխկտոցը գձըմ, եղնա սապնաթասով գլխին վրա ա բերըմ, նղավացնըմ ա, գնըմ ա բլանիքը վեր ունըմ, դուռը բաց անըմ, ու հայդե դբա իրանց տուն: Տուն ա մտնըմ, դուռը եղնուց պինդ փագըմ:

Դրաուլբաշին ուշկի ա գալի, ըմանչըմ ա իրա արածից, եղնա մտկըմը դնըմ ա՝ ինատը հանե:

Տենըմ ա էլ ուրիշ ճար չկա, թաքավորի էլ գալու վախտն ա, բերըմ ա թաքավորի վրա մի նամակ գրըմ, ասըմ ա.— «Թաքավոր ապրած կենա, դու ինձ թամբահ արիր, որ քու ախչկա կուշտը մարթ չի թողամ, հմա ես ինչ անեմ, որ քու ախչիկը օրը հինգը կուշտն ա տանըմ, հինգը դուս բերըմ: Ես էլ քու ախչկա ջուղաբը տվողը չեմ»:

Թաքավորը որ էդ նամակը կարթըմ ա, մագերը բիզ-բիզ են կաղնըմ:

Իրա տղին հրամայում ա, ասըմ ա.— Կգնաս էդ անսկամին էս թրով կը կըտրատես, արինն էլ սրփիլ չես, թուրն ու իրա շաբիքը արնակոլով կբերես իմ աղաքը:

Դրանց ճամփըմը գալիս թողըմ ա, ինքը աղաք ա ընգնըմ, թոցրած գալի տուն: Գալիս տենըմ ա դուռը դայիմ փագած: Մնըմ ա ըմացած:

Դուռը թխկացնըմ ա, քիրն ասըմ ա.— Էդ ո՞վ ես:

Ասըմ ա.— Քու ախպերն եմ, դուռը բաց արա:

Ասըմ ա.— Ես հվատըմ չեմ, չկելն իմ հերը գա ոչ, ես օչում ըղաքին դուռը բաց չեմ անիլ:

Շատ որ ախպերը դանչանք ա անըմ, քիրն ասըմ ա.— Դե մի նշան տու, որ տենամ իմ ախպերն ես:

Ախպերը հանըմ ա իրա ձեռնաղլուխը տալի, տենըմ ա, որ դրուստ իրա կարած ձեռնաղլուխն ա:

Ըտի նոր դուռը բաց ա անըմ, ախպերը տենըմ ա կանանչը դռան տակին մի թզաբոյ ա դառել:

Նոր էնա փթաթվում ա քվոր շլնքովը պչապչորվում են քիր ու ախպեր:

Հմի ի՞նչ անե, ինքը տենըմ ա, որ քվորը շառ են անըմ, հոր խոսքն էլ կարալ չի անկատար թողա, գիտե որ թաքավորը դրավուլբաշուն շատ ա հվատըմ: Տենըմ ա էլ իլլաջ չկա, ասըմ ա.

«Քիրա ջա՛ն, մեր հերն ու մերը գալիս են, արի գնանք աղաքներուն»:

Քիրն ուրախանըմ ա, հագրվըմ ա, որ գնան, հմա իրան հետի պատահմունքնին ախպորն ասըմ չի, կենըմ ա հերը գա: Ախպերը ձիուն վեր ա ըլըմ, քվորը թարթին ա դնըմ, ընգնըմ ա ճամփա: Գնըմ են մի ծմակի թալըմը վեր գալի, որ քիչ դինջանան:

Քիրը շատ ա բեզարած ըլըմ (տանը փագվածը որ մի անգամից դուս գա, ճամփա կտրե, ինչ թավուր կլի), գլուխը դնըմ ա ախպոր գոքըմն ու քնըմ:

Ախպերը մտածըմ ա, ասըմ ա.— Լավն էն ա սրան ըստի քնած թողամ, ես գնամ:

Կամաց քվոր գլուխը բցրացնըմ ա ծնգան վրիցը, դնըմ ա մի քարի վրա, ինքը վե կենըմ գնըմ խուրջնիցը քվոր շաբթուցը մինը հանըմ, տանըմ ա մի ալապոստրակ սպանըմ, նրա արնի միջին թուրն ու շաբիքը թթախըմ, ձիուն վեր ըլըմ, ընգնըմ ճամփա: Տանըմ ա հորը հվատացնըմ, թե քվորը սպանել ա:

Քիրն ըտի շատ ա քնւմ, քիչ ա քնւմ, ինքը գիտէ, մին էլ զարթնւմ ու տենւմ, որ ոնչ ախպեր կա կշտին, ոնչ բան: Լաց ա ըլլմ, ձեն ա տալի, համա ծմակիցը եղ իրա ձենն ա լսւմ: Վի յա կենւմ ու ընգնւմ եղ ծմակը, գնւմ, թե ո՞ւր, ինքն էլ չգիտէ: Գնւմ ա, գնւմ, շատն ու քիչը էլ եղ ինքը գիտէ, մին էլ տենւմ ա, հրէ հեռվից մարթիք են գալիս: Ըտի մի ախպրի գլխի մի ուռըքի ա ըլլմ, դա վեր ա ըլլմ եղ ուռըքուն, որ դրանք գան անց կենան, տենան ոչ իրան: Էկողնու մեջ Սայաթնովն ա ըլլմ: Դրանք գալիս են եղ ախպրի կշտին վեր գալի, հաց ու մաց ուտւմ, դինջանւմ, եղնա Սայաթնովն սագն առնւմ ա (ինքը աշուղ ա ըլլում) ու երգւմ: Դա էն դայդի երգւմ ա, որ եղ սար ու ձորը հետը ձեն ա տալի:

Դա թագավորի աշըղ ա ըլլմ, թաքավորի հետ Էկած են ըլլմ ֆորս անելու, քանի երգւմ ա, թագավորն էլ ա երգիլ տալի: Որ շատ երգւմ ա, բերանը ցմաքւմ ա, հա գնւմ ա ախպրի վրա կռանւմ, որ ջուր խմէ: Մի կում բերանը չառած՝ տենւմ ա ախպրի միջին մի սիրուն ախչիկ, մնւմ ա հուշ էլած, թե եղ ինչ բան ա:

Եղ ա դառնւմ թագավորին ասւմ ա.— Սիւ-սիւ:

Թագավորն ու իրա նազիրը գալիս են մտիկ անւմ, նրանք էլ են հուշ ըլլմ:

Սայաթնովը մին էլ ա գալի մտիկ անւմ, մին էլ գլուխը վեր ա քաշւմ, տենւմ ա ուռըքու վրա մի սիրուն ախչիկ նստած:

Դա որ մտիկ ա անւմ հա, ուշկը գնւմ ա:

Աղաք դրան ջուր են վրա տալի, ուշկը եղ բերւմ, եղնա թագավորն ասւմ ա.— Ո՞վ ես, այ ախչի, վեր արի:

Հմա նա տեղիցը ժած չի գալի: Մին էլ նազիրն ա ասւմ, հմա եղ ժած չի գալի: Ըտի Սայաթնովը եղ սազը ձենն ա առնւմ, երգւմ ու երգով դրան վեր ա բերւմ:

Ախչիկը վեր ա գալի, ասւմ են.— Ո՞վ ես դուն, այ ախչի:

Ըտի թաքավորն ասւմ ա.— Ո՞ւմ դսմաթն ա սա:

Ըստիան-ընդիան ասւմ են.— Տանք Սայաթնովին, նա սեր ա ձգել վրեն:

Ընդիան նազիրն աղաք ա գալի, ասւմ ա.— Դա ինձ ա լայադ, ըսօրվա ֆորսն ինձ ա հասնւմ (չունքի ամեն օր մնի հմար են ֆորս անելիս ըլլմ):

Որ շատ, որ շատ թաքավորն ասւմ ա.— Դու կնիկ ունիս, հայ քրիստոնյան էրկու կնիկ չի պահիլ, սա կտանք մեր Սայաթնովին:

Սայաթնովն մի ուրախանւմ ա, մի ուրախանւմ ա, որ էլ ասելու ոչ: Բերւմ են դրանց հարսանիք են անւմ: Հմա նազիրն ընդի դնջոնջոտւմ ա:

Անց ա կենւմ օխտը տարի, հմա էն կրակի Էկածը եղ խոսւմ չի: Սայաթնովն էնքան ա սիրւմ դրան, որ էլ ասելու ոչ: Դրանք ունենւմ են էրկու տղա ըրեխա: Սայաթնովը գնւմ ա վենձի հմար մի փետե ձի ա առնւմ, բերւմ ա, որ տանը խաղ անէ: Հերը տանիցը դուս ա գնւմ թե չէ, եղ էրկու ըրեխեն իրար հետ կովւմ են, իրար ծեծւմ են, լաց են ըլլմ:

Սա ասւմ ա.— Ինձ տու՝ ես խաղ անեմ:

Նա ասւմ ա.— Ինձ տուր՝ ես խաղ անեմ:

Որ շատ են կովւմ, մերն էլ կարւմ չի նամուս անէ, ասւմ ա.— Յանի որ տնաշենն էրկուսն առնէր ինչ կլէր, կովիլ մեք, բալա ջան, կովիլ մեք, ըրիգունը գա, կասեմ մինն էլ առնի:

Վենձ տղեն մոր ձենը լսւմ ա թե չէ, ձին թողւմ ա, գալի մոր խտիտն ա ընգնւմ, ասւմ ա.—

Նանի ջան, բա խի՞ չէիր չկել հըմի խոսւմ:

Ըտի նաչարը ձեռը բերնին ա դնւմ, հմա էլ նոր ի՞նչ:

Ըրիգունը Սայաթնովը տուն ա գալի թե չէ, վենձ տղեն վազւմ ա աղաքը, հորն ասւմ:

Հերն ասւմ ա.— Դե տուս կաց, էքուց էլ կկովեք, ես իմ ընգաճովը իմանամ:

Էքսի օրը գալիս ա դռան տակին տապ ա անըմ, էդ ըրեխեքը կոժըմ են, էլ էդ մերներուն ասըմ ա.— Կոժիլ մեք, բալա ջան, կոժիլ մեք, ձեր հորը կասեմ, մինն էլ առնի:

Սայաթնովը, որ ձենը ընգաճովն ա ընգնըմ, քիչ ա մնըմ էդ ուշկը գնա:

Դռան տակից դուս ա գալի, գնըմ ա փթաթովըմ, ասըմ ա.— Բա որ դու տհե քաղցր լիզու ունիս, խի՞ չես էս օխտը տարըմը մին էլա ձեն հանըմ, տո անիսափ:

Ասըմ ա.— Դե ի՞նչ ձեն հանեմ, դու հե գիտես լալ եմ, էս էլ լալ եմ կենըմ, համ էլ էսքան վախտ բա ասըմ չե՞ս, թե էս էլ մորից եմ էլել, էս էլ վաթան ունիմ..... Դե դու հարց չես ըլըմ, էս էլ բան չեմ ասըմ:

Ասըմ ա ու կրակի էկածի սիրտը լքցվըմ ա, լաց ա ըլըմ: Ըտի Սայաթնովը նոր հարց ա ըլըմ, իմանըմ ա, որ փլան թագավորի ախչիկն ա: Դա դանչանք ա անըմ, որ իրան տանի հորանց:

Սայաթնովը սարքվըմ ա, հագրվըմ ա, որ իրա կնգանը տանի հորանց: Ամեն բան որ պատրաստ ա ըլըմ, գնըմ ա թաքավորից իրավունք առնի:

Թագավորն ասըմ ա.— Ես առանց քեզ մի օր էլա կարալ չեմ կենամ, քի թողալ չեմ գնաս, բա ինձ հմա ո՞վ երգե:

Ասըմ ա.— Թե ուզըմ էս, իմ նազըրի հետ կորգեմ:

Սայաթնովն էլ կարըմ չի բան ասե:

Դրանք սարքվըմ են, մի ֆայտոնի միջի Սայաթնովի կնիկն ու իրա էրկու էրեխեքն են նստըմ, մեկելնու միջին էլ նաղիրն ու իրա գորքերը... Գնըմ են հասնըմ մի ծմակ, մութն ընգնըմ ա:

Դրանք ըտի ջոգ-ջոգ չատըրնի են վեր թողըմ, կրակ են վառըմ, ուտըմ են, խմըմ, քնըմ:

Սայաթնովի կնիկն էլ ջոգ չաղրի միջի, իրա ըրեխանց հետ ա ըլըմ: Քշերվա մի վախտը, որ չիմն էլ խորը քնի մեջ են ըլըմ, էդ նազիրը գնըմ ա մտնըմ էն նաչարի չաղիրը:

Ասըմ ա.— Ի՞նչ ունիս ըստի:

Ասըմ ա.— Գլուխս գլխիդ հետ մին տես անիլ:

Ասըմ ա.— Չէ՛, որ չէ՛, դա ըլելու բան չի, հեռացի ըստիան:

Ասըմ ա.— Վենձ տղիդ գլուխը կտամ:

Ասըմ ա.— Թեկուզ չիմնու գլուխն էլ տաս՝ ըլելու բան չի:

Էն իսափ կտրածը վենձ տղին դնըմ ա ոտի տակին, գառան պես ճիտը կտրըմ ա, դեն գցըմ:

Եդ ասըմ ա.— Կամ գլուխդ գլխիս հետ մին տես անիլ, կամ թե չէ էն մի տղիդ գլուխն էլ եմ տալի:

Ասըմ ա.— Ուզըմ էս իմ գլուխն էլ տուր, դա ըլելու բան չի:

Էն մինն էլ ա էդ օրը գձըմ: Նաչարը տենըմ ա էլ իլլաջ չկա, էրկու տղի ընգաճնին էլ մխկտալով կտրըմ ա, ջեբը գցըմ:

Ասըմ ա.— Բա հմի ինչ էս ասըմ:

Ասըմ ա.— Էլ ինչ տեմ ասիլ, էդա քո արածը արիր, ջուխտ ըրեխիս մորթեցիր, սիրտս գնըմ ա, գնամ ըրեսիս ջուր տամ գամ:

Ասըմ ա.— Բա որ փախչե՞ս:

Ասըմ ա.— Հտայ, էդ քանդորովը կոնիցս կապե:

Նազիրը դրա կոնիցը քանդորով կապըմ ա, ասըմ ա.— Դե գնա:

Դա գուգումն էլ հետը տանըմ ա, որ մթամ ջուր բերի: Տանըմ ա, քանդիրը կոնիցը էդ ա անըմ, գուգումի ընգնիցը կապըմ, ինքը կորչըմ:

Նազիրը ճամփա ա պահըմ, տենըմ ա էկավ ոչ: Քանդիրը քաշըմ ա, տենըմ ա գուգումը թոլեթոլ ըլելով էկավ: Դա դի ա տալի, իրան մեկել գորքին ասըմ ա.— Ձեր մեշկը կոտրի, ի՞նչ եք քնոտել, դաչաղնին էկան ըրեխանցը մորթեցին, խանումին էլ փախցրին:

Դրանք վե են կենըմ դես ման գալի, դեն— կա ոչ: Վեր են կենըմ ըրեխանց մեյիդը եդ ֆայտոնը լքցնըմ, եդ գնըմ ասըմ են.— Սիե, սիե:

Նայար Սայաթնովը ծնգներին ու գլխին վեր ա հատըմ, իրան գլուխն ա վայ տալի— հմա նոր էլ ի նշ:

Էն նաչարն էլ չուլե-չուլ ընգնելով, լաց ըլելով գալիս ա մի տեղ դուս գալի: Տենըմ ա հրե մի չոբան ոչխար ա ըրածացնըմ: Գնըմ ա էդ չոբանի կուշտը, սոված՝ նուրը կտրած ա ըլըմ, ասըմ ա.—

Ինձ մի քիչ ուտելու բան չե՞ս տալ:

Էդ չոբանը դրա հմար կաթն ա կյըմ խմացնըմ, եղնա հարցնըմ ա, ասըմ.— Քիրա ջան, ո՞վ ես դուն, որ մենակ էս չուերըմ ման ես գալի:

Ասըմ ա.— Ես ճամփես մոլորած մի անտեր ախչիկ եմ:

Ասըմ ա.— Դե դուն ինձ քիր, ես քի ախպեր:

Ասըմ ա.— Չոբան ախպեր, ինձ մի լավութին արա, առ էս մատնուքը, քո շորերն ու մի ոչխարի դառին ինձ տու, իմ շորերն էլ տար քու կնգանը հաքցրու:

Չոբանն էն հաղաղը մի ոչխար ա մորթըմ, մսից մի լավ դաուրմա յա անըմ, ուտացնըմ, դառինն էլ տալիս ա դրան, իրան շորերն էլ ա տալի, ինքը յափընչու միջին փթաթվըմ ա, չկել տուն հասնի:

Ասըմ ա.— Առ էս ոսկի մատնուքը:

Ասըմ ա.— Ախպերը քվորիցը հախ չի ուզիլ, դա ո՞վ գիտե, քո սիրածի տված նշանն ա, ես վեր չեմ ունիլ:

Դա դրան շնորհակալութին ա անըմ, եդ ընգնըմ ճամփա:

Գալիս դուս գալի իրա հոր քաղաքը:

Գնըմ ա իրանց տան դռանը կաղնըմ, ասըմ ա.— Ինձ նոքար չեք անի՞լ:

Իրան մերն ասըմ ա.— Վա յ, ոնց որ իմ բալի աչքերն ըլին:

Հերն ասըմ ա.— Շաշ ու մաշ քիչ խոսա, էս օխտը տարըմը ով գիտե նա որդի ա փթել, շան ու գիլի փայ դառել:

Եղնա դրանք դրան նոքար են անըմ, որ իրանց դագերը պիե:

Էն կրակի էկած Սայաթնովն էլ ընդի խու դաթար չի կենըմ: Ոնչ քշերն ա քունը տանըմ, ոնչ ցերեկն ա հանգիստ ունենըմ, իրանից երգեր ա հնարըմ ու միկտըմ: Մի քանի օր տիե իրան կորցրած յանդրմիշ ա ըլըմ, եղնա ասըմ ա.— Ես գնալ տեմ իմ կնգանը գոնուլ:

Իրան սագը վեր ա ունըմ ու ճամփա ընգնըմ:

Թաքավորն ինչքան դնամիշ ա անըմ, ասըմ ա.— Նոր նրան սաղ գոնուլ չես,— իլլաջ չի ըլում: Տենըմ ա էլավ ոչ, ասըմ ա.— Դե ես էլ եմ գալի, գնանք գրդնունք քու սիրածին:

Էն շուն նագիրն էլ հետներնուն վեր են կենըմ, ընգնըմ ճամփա: Աշխարե-աշխարի ման են գալի, որդի մարդ են ջիըմ՝ հարց են ըլըմ, որդի ծմակ են ջիըմ՝ տակն ու վրա են անըմ, որդի շեն են տենըմ, հարց են ըլըմ, հմա մի տեղ էլա գոնըմ չեն: Որ շատ գալիս են, դուս գալի իրա կնգա հոր քաղաքը: Էդ քաղաքըմ գնըմ են մի ախպրի կշտի նստըմ, որ կնանիքը գան ջուրը, բալի իրա կնգանը մեչներուն տենա: Ըտի Սայաթնովն էլ իրա սագը վի կալած, ջուռա-ջուռա խաղեր ա ասըմ, չիմ կնանիքը հվաքվըմ են թամաշա: Թաքավորն էլ շորերը փոխած ա ըլըմ, ո՞վ գիդե թե աշուղի հետինը թաքավոր ա:

Հենց էդ վախտը հերն ախչկանն ասըմ ա.— Քյաչալ ջան, քյաչալ, գնա սառը ջուր բի խմենք:

Էրվածը գալիս ա տենըմ, որ իրա Սայաթնովն ու թաքավորը, մին էլ էն գյուլլա դիբած նագիրը ընդի նստած են: Ըտի մին ուզըմ ա գնա մարթի խտիտն ընգնի, հմա եդ իրան պիըմ ա:

Խատատ-մատատ ջուրը կուժն ա լքցնում, տանում ա տալի հորն ու ասում ա.— Խազեին ջան, էսքան վախտ ձեր տանը դուլլուդութին եմ անում, ձեզանից ոնչ հախ եմ ուզել, ոնչ էլ ուզում եմ, մենակ խնթրում եմ, էս քշեր թողուք իրեք դոնախ բերեմ տուն:

Հերն էլ, մերն էլ ասում են՝ իրավունք ունիս, գնա կանչի գան:

Մթնելիս ա ըլում, գնում ա ասում.— Աշուղնի ջան, իմ խազեինը ձեզ կանչում ա էս քշեր իրան դոնախ:

Դրանք վեր են կենում, դրա հետ գնում: Հլա գոգալ դրանց պատիվ են անում, Սայաթնովն էլ երբքում ա, դրանց ուրախացնում ա, եղնա էն եղատարը հորն ասում ա.— Խազեին ջան, ըսօր տան իրավունքը ինձ չես տա լ:

Ասում ա.— Խի չեմ տալ, աչքիս վրա, քյաչալ ջա՛ն: Ըրիգունը դրանք նստում են բուխարու դրաղին, գրից են անում դեսից, դենից, ամենքն իրանց գիդեցածից մի բան են ասում:

Եղնա իրա հերն ասում ա.— Այ իմ դոնախնի ջան, մեր քյաչալն էս ինչքան վախտ ա իմ տանը ուսլուբին դուլլուդ ա անում, հմա ես դեռ նրան մի բանով լավութին չեմ արել, ըսօր նա ինքը խնթրեց, որ ես ձեզ դոնախ անեմ իմ տանը: Ես նրա խոսքը կատարեցի, հմի էլ ես տիմ նրան մի բան խնթրիլ, թող արա մի պատմութին անե ու մեզ ուրախացնե:

Ըստիյան ընդիյան ասում են.— Հա, հա, թող մի բան ասե:

Քյաչալն աղաք ա գալի, ասում ա.— Ես կպատմեմ ձեզ հմար մի հեքիաթ, հմա պետկ ա իմ հեքիաթին անգաճ անեն փլան դրաուլբաշին, փլան պառավը, մին էլ փլան չոբանը:

Չիմն էլ ըմմանում են: Եղնա մարթ են դրգըմ՝ կանչիլ տալի էս ասածնուն:

Դա չոբանին աչկով ա անում, ասում ա.— Հլա դեռ յավաշ:

Բերքում ա իրան պահած դազերից մինը մորթում, փետում, շամփրի ծերն անցկացնում, գնում ա բուխարու միջին, չոբանին ասում ա թուրքերեն.— Այ չոբան, չավուրն դազի յանմասն, գեղան-գյալան օլմասն (մթամ թե — դազին օրոն իլ բուխարումն էրվի ոչ, շեմքումը կանգնի, դուս ու տուն անող էլ ըլի ոչ):

Չոբանը հսկանում ա, իրա չոմբախը ձեռն ա ունում, շեմքումը կաղնում ա: Քյաչալն սկսում ա իրա գլխի էկածին չիմ պատմիլ, հմա չկել վերչն ասում չի, թե ինքն ա:

Ասում ա.— Ըլում ա չլում մի թաքավոր, դա ունենում ա մի տղա, մի ախչիկ, դրանք գնում են մատաղ անելու, տանը թողում են ախչկանը, մենակ, պահ են տալի քաղաքի դրաուլբաշուն:

Ըտի չիմն էլ բերաններուն բաց արած անգաճ են անում:

Մերն ընդի ծվում ա, ասում.— Էդ իմ բալի նաղլն ա:

Քյաչալս տենում ա իլլաջ չկա, ասում ա.— Թե չկել վերջը անսաս անգաճ կանեք՝ կասեմ, թե չէ՝ խու ասիլ չեմ:

Չիմն էլ ասում են.— Ասա, ասա, անգաճ կանենք:

Դա հլե դրավուլբաշու անումը տալիս ա, ասում ա.— Թողեք մի սհաթ գնամ դուս ու գամ, էս ինչ շոք ա:

Ընդիյան չոբանը չոմբախը դնչին դեմ ա անում, թողում չի: Հմի էլ պառավն ա տհենց անում, հմի էլ իրա ախպերն ա տեղից վեր թռչում, վերջը որ հերթը հասնում ա Սայաթնովին, որ պատմում ա, թե ոնց ա ծառի վրից վեր բերել, քիչ ա մնում վրա հասնի դրա խտիտն ընգնի, ասե՛ դու կգիտենա՞ս ուր ա իմ սիրածը: Հմա եդ քյաչալի դրած պայմանը միտն ա ընգնում, անսաս մնում ա, ասում ա.— Տենանք վերջն ի՞նչ ա դուս գալի:

Որ նազիրի արարմունքնուն ա հասնում հերթը, նազիրն ասում ա.— Ի՞նչ էք անտեղի էս շաշ քյաչալի զրցնուն ասգաճ անում, իմ քունը տանում ա, էս գնում եմ քնելու:

Ըտի չիմն էլ դրա վրա չրանում են, ասում են.— Մուս կաց:

Դա վեր ա կենըմ, թե դուս ըլի, էդ չոբանը չոմբախը ճկատին դեմ ա անըմ: Վերջն՝ էլ ինչ գլուխդ ցվացնեմ, էնա չիմ ասըմ ա, իրան ըրեխանց ընգաճնին էլ դեռ պիեյիս ա ըլըմ, ջեբիցը հանըմ ա, դառինն էլ գլխիցը հանըմ ա, մազերն ուսերովը շաղ են ընցնըմ— ամեն բան աշկար ա ըլըմ, նոր դրանք բերըմ են պառավ ջադուքարին, էն դրավուլբաշուն, մնել էն գյուլլա դիբաժ նազըրին կապըմ են դաթրնու պոչիցը, քաշ տալի, ստկացնըմ են, պրծնըմ:

Ըտի նոր իրար փթաթվըմ են, թագա հրսանիք են անըմ, թագա քեփ են անըմ, պրծնըմ են ամեն ցավից ու չոռից, նրանք հասնըմ են իրանց մուրազին, դուն էլ հասնիս քու մուրազին: